

四庫全書

集部

# 欽定四庫全書

集部

御定歷代賦彙卷一百三十五

詳校官檢討<sub>臣</sub>劉 炘

主事銜<sub>臣</sub>徐以坤覆勘

總校官編修<sub>臣</sub>王燕緒

校對官中書<sub>臣</sub>潘曾起

謄錄監生<sub>臣</sub>李廷讓

欽定四庫全書

御定歷代賦彙卷一百三十四

鳥獸

麒麟賦

有序

明夏原吉

永樂十有二年秋榜葛剌國來朝獻麒麟今年秋麻林  
國復以麒麟來獻其形色與古之傳記所載及前所獻  
者無異臣聞麒麟瑞物也中國有聖人則至昔軒轅時  
來遊於圉成康之世見於郊薮是後未之聞也今西歲

之間而茲瑞載至則聖德之隆天眷之至實前古之未  
有也宜播之聲詩以傳示無極臣忝職地官屢覩盛美  
不揆蕪陋謹拜手稽首而獻賦曰

惟我皇之明聖兮膺天命而御極環六合以為家統四  
裔而混一化洽殊方仁覆萬物和氣所鍾禎祥疊出而  
仁瑞之獸所以復獻於今日也爾其滄海之濱瑞氣勃  
鬱玄枵降精二儀合德榮光燭天輝耀赫奕山岳為之  
炫映江海為之滋液百獸為之奔衛萬靈為之拱翼而

麒麟於是生焉豐骨神異靈表瑩潔霞明龍首雲擁鳳  
臆星眸眩子焜耀龜文燦子煜熠牛尾拂兮生風鬻身  
動兮散雪蹴馬蹄兮香塵接腕聳肉角兮玉山貫額步  
無躑躅必中規而蹈矩聲無哮闐自協商而應律固不  
犯乎陷阱亦豈傷乎生物是以不奮而威不猛而烈虎  
豹見之遁藏犀兕遇之辟易封豨巨豨雖悍戾而誰美  
麇麇豺貉顧旁午其何益彼漢廷之角端徒自誇其美  
而渥注之神駿焉能與之匹茲實聖世之奇瑞匪有資

於人力此所以海隅島夷不敢自逸乃梯山而航海於  
以獻於中國於是離遐陬道滄溟越重譯望帝京侑之  
以方物達之以至誠匪惟效職於王會蓋將昭德於聖  
明於是時也天門洞開袞龍在御瑞物既呈祥煙斯布  
散精彩於彤墀濯儀文於甘露或昂首而欲馳或跪起  
而欲舞重瞳載顧百辟歡欣曰惟此獸希有之珍昔在  
軒轅曾一來馴暨周成康郊藪是臻歷千載而及茲乃  
有感於皇仁越期歲而再至實前古所未聞是宜播之

聲詩勒之金石著盛治之無窮延休徵於莫極顧微臣  
之謏謏覩盛美而愉懌爰稽首而獻賦頌聖德於萬一

麒麟賦

明  
劉定之

聖天子膺洪圖守神器繼累聖而大業光奉兩宮而達  
孝備夫然故道不愛於天寶不愛於地但見炎荒雪嶠  
效竒踵來日本氏貢琛尾至而猶未足表太和符至  
治也爰有竒祥實乃四靈之首間生曠代在夫英里之  
陸馬足象乾而動直牛尾法坤以靜垂文周于身不耀

而其章自炳肉生於角不觸而厥性孔慈音含舜韶之  
律呂步中禹度之矩規爾乃隨逐使旌經年始至於赤  
縣祇陳貢牘涓日用進於彤墀軒昂馴習回轉委蛇聞  
都俞而欲效率舞之態仰睟表而宛生瞻依之思仁振  
振兮允合王化靈昭昭也式際昌期於是羣臣欣躍稽  
首陳辭以為吾皇道符軒后故昔在郊而今復見於域  
中績邁成康故彼遊藝而此則達於闕下况魯甸之覆  
何足並驅而漢時之逢豈堪方駕於以見百王之盛莫



比萬世之祚無疆請告郊社彰鉅美書墳典垂休光聖  
天子穆然深思謂禎祥之至必本乎至誠休徵之臻在  
建乎皇極願因天眷謹天德而勿務乎文以或怠其實  
然後羣臣恐懼跼蹐共承明詔各虔厥職復相與歎曰  
麟之出也猶前古而曾聞吾皇之德也誠自古而罕及

獅子賦

唐  
虞世南

惟聖皇之御歷乃承天而則大治至道於區中被仁風  
於海外通鳳穴以文軌襲龍庭以冠帶含夷言於橐街

陳方物於王會渺渺地角悠悠嶂表有絕域之神獸因  
重譯而來擾其所居也巖磴深阻盤紆絕峻翠嶺萬重  
瓊崖千仞馬頓轡而莫升車摧輪而不進伊方服之君  
長召積風而奉進爾乃發烏代過白狼踰絕巘跨飛梁  
越流沙而遙集超積石而高驤其為狀也則筋骨糾纏  
殊姿異制闊臆脩尾勁毫柔毳鈎爪鋸牙藏鋒蓄銳殫  
耳宛足伺間借勢登乎奮鬣舐脣倏來忽往瞋目電曜  
發聲雷響拉虎吞貔裂犀分象碎道兕於斷齧屈已蛇

於指掌踐藉則林麓推殘哮呼則江河振蕩是以名將  
假其容高人圖其質罄其威以凌厲美其風而贊述鑒  
倚伏以縈身乃有識之高軌彼白猿之騁妙終取斃於  
弧矢雖玄豹之幽棲亦捐軀於巖趾並同亡而異術豈  
行藏之足紀何茲獸之明智獨出處以殊倫雖奮武以  
馴勢乃知機而屈伸去金方之僻遠仰玄風之至淳服  
猜心與猛氣遂感德以依仁同百獸之率舞共六擾而  
來馴斯則物無定性從化如神譬鱗羽變質於淮海金

錫成器於陶鈞當是時也兆庶欣矚百僚嘉歎悅聲教之遐宣屬光華之在旦臣載筆以叨幸得寓目於奇翫順文德以呈祥迺編之於東觀

獅子賦

有序

唐

牛士

上士曾讀實錄貞觀九年西域進獅子秘書監虞世南獻賦前史美之竊謂虞公博物洽聞誠則可重環瑋個儻或非所長欲精體物乃賦其事

窮汗漫之大荒當崑崙之南軸鑠精剛之猛氣產靈猊

之獸族指千里於崇朝逾鐵山而往復非取俊於熊豹  
豈方姿於彪羆故其方頤威額隅目高睨攢地蹲踞騰  
空抑揚簇拳毛以被勁縷柔毳以為裳逢之者碎犀象  
聞而頓伏值之者破鵬鷃不敢飛翔哮呼奮迅睖眴騰  
振掌獲攢鉞口銜霜刃怒雙睛以電射揭一吼而雷震  
似烏獲之摧鋒疑項王之入陣及夫朝晡未食鼓鬣奮  
力後勁雙曠前張闊臆蹉殊榛以傲睨跳絕梁而合絕  
倏橫噬而風馳乃掉尾而雷息口裂奔軀足捎狂兇猛

虎推於掌握豪猪碎於牙齒既飽飫而心和乃宛頸而  
帖耳彷徨於金河之外生長乎葱山之裏嘉此獸之奇  
傑邈躋動而殊材隨馬牛而內向順謳歌而竭來逾鳥  
城之積阻獻龍闕之崔嵬資譯人之納貢弭雄心以致  
能何虞者之維繫驚牙爪之可怖頓金鎖而長縻閱鐵  
牢而永固悲此生之窘束懷舊國而愁慕雖食肉於富  
年思盡力而無路羨文豹之猗鹿美韓盧之逐兔伊薄  
技之見收而偉材之不顧聞夫天以煦育為施草木皆

春帝以惠訓為施猛戾皆仁夏后氏擾驪龍而伏阜軒  
轅氏役熊羆以佐人此奇獸之為用豈無用而來馴何  
不校之於搏擊投之於絕倫而使之鬱鬱於窮檻區區  
於後塵者乎

越人獻馴象賦

以辭林邑望  
國門為韻

唐  
闕名

倬彼馴象毛犀所推特稟靈於荒徼思入貢於昌期豈  
不以獻我令辰自林邑而來者稽諸舊史在成康而紀  
之一則識王者之無外一則見遐方之不遺苟形環之

足偉孰路遠之云辭於是出豐草去長林殊狒狒之被  
格異猩猩之就擒厲其容也故獸伏我力和其性也故  
人知我心作蠻方之貢為上國之琛萬國標奇名已馳  
於魏闕千年表慶價實越於南金況乘之便習或訛或  
立動高足以巍哉引脩鼻而噓吸塵隨蹤而忽起水將  
飲而迴入牙櫛比而慘慘眼星鰐而熠熠中黃雖勇力  
不能加蒼舒信奇知之莫及服我后之皐棧光我唐之  
城邑驅之則百獸風馳翫之則萬夫雲集故其威容足



尚筋力殊壯輪困而重若旄丘顛負而高如巨防執燧  
奔戰牽鈎委貶遇之者或驚駭而反行覘之者或披靡  
而遙望何斯象之剛克兼美義之不忒懼有齒而焚軀  
故全身而利國縱使牛能任重馬有報德徒久困於輪  
轅又每傷於銜勒豈如我邈自遠藩來朝至尊辭桂林  
之小郡入閭闔之通門負名聞之籍籍守馴擾以存誠  
幸投之於芻藁豈敢昧於君恩

越人獻馴象賦

以辭林邑望  
國門為韻

唐杜洩

惟彼馴象產乎南夷其形大也因地而受氣其性順也  
從心之所資食豐草於幽巖之麓飲清流於長江之濱  
不忌於人如得其時推誠於物任以繫維此吾王之化  
被也故遠人得而獻之中心搖搖其道遲遲左顧右盼  
知出羣之已速廣思遐想與草澤而長辭脩途是尋疊  
嶂峴嶽或行於陸但隨山而上下或載於舟距涉江之  
淺深既濟水以次水復出林而入林所過之邦徒觀其  
駸駸之貌所遇之衆豈識其謙柔之心荒徼已遠王畿

斯入聞之者遐邇必至覩之者士女咸集人不知其故  
皆愕然而立或告之曰所馭之者越人所出處者林邑  
近之可仰遠之可望銓衡不能舉其體丹青足以圖其  
狀揣輕重者我有蒼舒之智高思柔服也我有周公之  
德王以之馳三軍比矛戟而齊鋒以之和六氣與蕭韶  
而俱唱稽其來也自南徂北嘉彼所獻克我王國食以  
筐筥牽以微纆將致貢於昆夷亦率職於丕熨斯之為  
義可得而論性之馴良表邊夷之向化體之固實揣中

齒斯存宜克耕於野輸衆人之力曷如我入貢需萬乘  
之恩雖自慙於陋質永願在乎王門

放馴象賦

以珍異禽獸無  
育家國為韻

唐

獨孤授

彼炎荒子王國是賓比馴象子越俗所珍化之式孚則  
必受其來獻物或違性所用感於至仁吾君於是詔掌  
獸之官諭如天之意惟越獻象不遠而致惟已於物曾  
何以異徒見弭雄姿而屈猛志安知不懷其土而感其

類揆夫國用芻豢之費則多許以方來道途之勤亦至  
與其絀之而厚養孰若縱之而自遂且彼集於禁林我  
則有五色九苞之禽在於靈囿我則有雙鶻共觝之獸  
何必致遠物於外區崇偉觀於皇都是用返諸林邑之  
野歸爾梁山之隅時在偃兵豈嬰乎燧尾上惟賤賄寧  
恤乎焚軀非同委棄固或踟躕知拜跪兮則有謝渥恩  
予豈無復得顧侶求羣跨川登陸食豐草以垂鼻出平  
林而瞪目逍遙乎存存之鄉保守乎生生之福懷仁初

就於牽掣順理竟資於亭育游乎水同反身之龜處乎  
山異放麇之鹿大道茲始淳風不遐感以和樂亦參乎  
百獸率舞驅之仁壽寧阻乎四海為家奚必克帝庭之  
實駕鼓吹之車然後可以為國華者哉由是聖心乎於  
下國物靡不獲其所化乃允臻其極放一獸而庶類知歸遂  
四方而萬代作則彼周驅犀象漢放駿馬未可論功而校德

放馴象賦

以珍異禽獸無育家國為韻

唐獨孤良器

皇上御寶歷之惟新闡乾符發坤珍德被華夷敷雲雨

之廣澤恩及飛走含天地之全仁乃却走馬以反素斥  
馴象而不異非耳目之可役同寶玉之遐棄放之於無  
人之境歸之於不毛之地或羣或友伊飲斲之無虞載  
寢載興信生成之自遂解網之惠無聞放麋之仁克類  
然後以儒為林毓賢哲以為禽以道為圃利忠良以為  
獸亮功格於人神德齊於宇宙是由化與澤俱仁與道  
符賢為其實太康之訓不作獸用不擾虞人之箴遂無  
徇物之情允著好生之德式乎可以順天然可以遂亭

育既絕燧尾之患不虞焚身之戮去狂顧於人寰徇野  
心於林麓伊昔漢氏惟其晉家焚雉頭之裘於前殿却  
千里之馬於後車猶自颺休垂美有聞無譁况我一人  
溫恭允塞本忽之而勿營非欲之而復抑往籍之所未  
覩前王之所不克誠可以懷四夷柔萬國者也

獬廌賦

以觸物知邪自  
然靈獸為韻

唐

闕名

獬廌出乎唐堯之年神羊至於我后之前雖一物異見  
實兩時皆然既曰珍祥亦稱絕異是考其迹莫問所至



乃審厥生不知其自步玄墀以龍擾向彤庭而鶚視夫  
其洪纖之狀周正之儀搏風比毳素絲類皮人間之所  
常覩天下之所備知蓋神羊之末事羌難得而稱奇及  
至一人視朝百辟咸矚張羅杞梓列布瓊玉雖衣冠有  
貌槐棘祇肅為公卿是匪匪神靈而不觸爾羊來思其  
儀孔嘉望表知裏揆瑜識瑕於是騰雙眸而舉柱聳特  
角而觸邪當之者則立成於犴獄見之者則固節於邦  
家無正不彰靡姦不屈常在公而為言匪從已而犯物

百發百中或受命於神祇無黨無偏寧奉辭於綸綍則  
知惟聖得一以理人得一以靈豈比獬羊下潛空呈怪  
於季井商羊上舞徒表沴於齊庭日者神直簪筆風潛  
衣繡順素節以擊揚奉白簡而彈奏指之者豺狼不避  
觸之者回邪莫漏彼神羊之信靈請從古而歸獸

獬廌賦

唐  
宗 高

精瑞氤氲子生獬廌之炳靈志耿介而不羣世情偽而  
尤難動微明而鏡分詩美乎思無邪道貴乎解其紛得

道之實為身之文豈徒神明其形將以幽贊人君涇也  
濁渭猶今在薰辨之以履霜堅冰無俾乎水深雪紛則  
致明如日月靈應如風雲所不至者固亦有聞夫道無  
為神無方聖人之政有以相合靈物之質不必咸章名  
用而行跡舍而藏與麟趾同符騶虞齊光肇允丕應時  
唯我皇咨爾輔弼咸懷忠良感觸邪之義成無妄之綱  
五福儲峙四靈彷徨爾有足子不行而至爾有角子其  
用也則人是知勸賞丁厥祥孰與鳳鳥去飛龍圖未揚

惜睽闕於明代竟流連於素王物亦生蠱邪行紊德雖  
明足辨類凶族起於唐虞智足周身讒巧傾於孔墨水  
火不可以同器邪正不可以同國懿茲神獸間執讒慝  
分兩造之疑冠百祥之特勇毅而能斷智明而不惑守  
法者仰之以司南疾惡者投之於有北固操斧而思用  
因伐柯而取則龍闕分官烏臺肅政扶直指之角象繩  
愆之性聯繡衣以生風借白簡而增勁物莫不肅時靡  
有競所謂君子道長邦家德政苟違中人斯同妄行豈

王臣匪躬之德叶哲后授賢之命瞻彼法冠恐其規鏡  
則載鷁聚鵠足為服之盛何必儀形神物示人以敬庶  
乎在位者竭能而輔政

猛虎賦

有序

明

王廷相

華山有虎患郡吏督虞人捕之殲六虎予哀夫以強力  
貪得而斃者不獨虎也遂賦之

嗟猛獸之揚厲據藪澤以為雄孰樵採之敢入望谿壑  
而憂恟彼麋豕以何辜偶邂逅而途窮力於爾以不敵

遂填吻而飽胃狐欺媚以相假亦走獠而詫狨矧咆哮  
而叱咤儵風颯而晝矇胡恣行而速出乃於人而肆兇  
慘細物之莫報智加爾夫奚容驅虞人以掩襲火山澤  
而遠攻陷甯伺罅罅羅揭秘勁弩四發藥鏃森會前殪  
後殪朋殲品斃以枉以徒或剝或剝目炯炯以電滅革  
斑斑而文碎非於爾以寡仁反徇馬之帷蓋要施報之  
所宜視為益而為害龍出沒以造神沛霖雨而澤世雖  
一睹之莫即孰機宥之可逮世赫赫以並稱羞神明之

莫配彼貪夫之殉財乃忍情而為鑿積衆怨以銷骨終  
殞生而敗類茲遂臭而蹈污寔見小而遺大哀靈物之  
寡謀匪斯獸之獨慨

雙虎賦

有序

明  
屠大山

嘉靖甲寅三月廿有八日黎明予行潛江之野忽人馬  
辟易徙者告余曰有二虎去車密適予審視之皆黝黑  
而其一額有白文徐入葦中良久乃伏予以事紆迴此  
地適覩茲獸有感於中述斯賦焉

驅予車於潛野際旭景之初分循春堤以前邁欣夢隴  
之氤氲倏人驚而馬顛若喪魄而忘魂僕夫速予以避  
虎曰姑停策以俟羣豪予幃以凝睇覩雙猛於丘墳振  
長風於江漢炳玄耀於乾坤雖爪牙之罔露固威稜之  
具存彼獨行之鮮敵矧偶遇而專邨下林臯之雄步踞  
溪澗之逡巡衆鼓譟而靡懾迫阨險而弗奔戢咆哮之  
烈氣閉精光而卑蹲初豎尾以前却竟旋趾而傍輪面  
予車以延佇若欲語而聲吞豈戒備於暴悍抑諭戢於



昏晨將招隱於閒曠或警弱於柔仁嗟予性之昧墨舍  
利路而弗遵秉孤志以直往每遭躓而邁屯行遭迴於  
潭畔心拂鬱之誰陳私閔憐之惘惘悄宵旦之昏昏含  
客感之默默悽離緒之絃絃意二物之來格殆靈祇之  
啟人謝刺術於下莊陋射藝於裴旻模懿矩於廉蔭懲  
私闕於復恂測靈情以自詔著斯文而書紳

戮雙虎賦

有序

明  
鄒魯

正德上章執徐春仲甲申吉水龔公令安溪之四月憫

茲邑民久罹虎患乃焚文於城隍之祠天神必獲越翼  
日乙酉果戮其一越三日戊子又戮其一民胥神之予  
目擊其事乃為賦其實焉辭曰

繫皇穹之賦物兮厥洪纖之夥繁溥元氣而磅礴兮均  
蟲臂與鼠肝亶造化之無心兮紛並育乎兩間胡惑沴  
以妨化兮迺黠悍而冥頑蛟鱷產於溪潭兮跌蛩叢於  
荆管鬼車凌空以呈怪兮鼪鼯螟蟻之恣夫貪殘惟虎  
狼之號擢兮伍衆醜其尤烈雖鼪鼯之殊形兮具養威

於巖穴朶逐逐之饒頤兮督號號而歎齧惛生民之罹  
毒兮愜棲止之晚靚駭欣掇觸而褫魄兮祥兪吮之弗  
盈嚶桃攬以驚姦子豨獫曾曷以寧槽彌町疇於郊垌  
兮時跋扈而憑陵嗟復齋之遐逝兮孰化覃於生生乃  
惟西方之美人子龔渤海之華裔咀椒蘭而佩茝蕙兮  
葺葑蘅以為戶皇既重之以脩能兮錫龍章與侯土挽  
清溪而前宿弊兮脫瘰癧以煦嫗彼猛獸之為患兮固  
前政之攸瘕侯引咎以責躬兮謂天儆余以紛攘爰作

冊兮裡禱適闕逢兮辰良與靈脩兮訂約冀速進予遐  
方越厥明兮旃蒙有奔告兮侯之宮曰虎夜涉波予茲  
困於叢洵侯之丹悃兮幽明以通侯心曩其奮迅兮選  
獐鬻以從事義和屏翳為之先驅兮羌發縱而指示鳴  
鉦鼓而顛覆兮割捨郤之碑司操戈矛與弓矢兮直戢  
往而前搜惡物吃哮以跳踉兮撓萬夫而辟易獲山靈  
之默相兮我威用以歛赫爰洞厥牖兮貫喁血若泉兮  
流紅乃陳功兮車下載戢戰兮橐弓越三日兮著雍於

溪澣兮復殄其雄餘以橐而遐奔兮徧黔黎以席慶念  
伊誰之攸託子荃有翼之人龍予追夫昔之伊耆兮殲  
獬豸與封豨迸犀象於窮荒兮疇克續夫蒼姬彼驅鱷  
而戮蛟子固聖謨之莫企也亦流芳於千載兮侯驂之  
而易愧也重曰維彼於菟肆厥兇兮民罔攸措心忡忡  
兮有赫者侯憤於衷兮爰明冊祝達神聰兮精誠感召  
置郵同兮尋殪其虜餘潛蹤兮民以寧止頌聲叢兮粵  
昔九江洎弘農兮哲人風響迨今雄兮侯之碩膚諒同

功兮我擣厥辭孰醵磬兮千秋萬禩以永譽於無窮子

蝻彪賦

有序

明

湯顯祖

予郡巴邱南百折山中有道士善檻虎兩函桁之以鐵  
中不通也左關羊而開右入虎懸機下焉餓之抽其桁  
出其爪牙楔而鏹之絙其舌已重餓之飼以十銖之肉  
而已久則羸然弭然始飼以飯一盃菜一盃未嘗不食  
也亦不復有一銖之肉矣以至童子皆得飼之已而出  
諸囚都無雄心道士時與撲跌為戲因而賣與人守門

以為常率虎千錢大者千五百錢初猶驚動馬牛後反  
見大牛而驚矣或時伸腰振首輒受呵叱已不復爾常  
置庭中以娛賓月須請道士診其口爪鵠剔擾洗各有  
期道士死其業廢予獨嗤夫虎雄蟲也貪羊而窮以至  
於斯辱也賦之

夫何山之一獸予受猛質於西旻貌低團而項廷鼻  
黝隆而齒銀目斜匡而電爍聲倨頷以雷殷舌理粗而  
銼樹鬚鋒橫而獵人爪含銛而卷曲尾拂箠而絙伸叱

形模其足怖矧精威之絕塵靜嘯而陰飈宰起坦步則稠林自分漂氣候之相制隱形勢而見尊况百折之深山常此窟之成羣黃斑屬而卧隴白頰連而飲津初涉味於牛馬遂舐及於人民戶震躬而屏徙或重遷而遠藩獨無生之道士故有心而與鄰力不加於子路術不詭於黃神布石關之宛轉交鐵葉以續綸界鳴羊於接檻誘聞羶而見循進密歷以窮路退踣躅而下門遂乃聊浪擲跌偻仄輪囷始傖甍而怒湧久牢騷而意煩氣



屈而顰力瘁而跋羗局拘而勢改積威約而理均於是  
道士欣焉待旦及晨舉之於懸處餓之以兼旬待威神  
之委頓任處置之紛紜未陷頭而投髻先胷爪而剔蹠  
捩權牙於巨斧磨刺舌以疏巾香泔變其腸胃清水洗  
其喉脣欲次第而施食已隨宜而致馴初猶啖以礮肉  
次則習以盤飧或設以稗粒之餘或投以松芥之根既  
苦飢而伏檻敢擇食以懟恩遂乃改山林之性氣狎雞  
犬之見聞遇夫人之下視即弭耳而意親諒厓柴之已

去放野牧以逡巡非止柔性兼弱其筋圓腰纖而脅息  
豔斑摧而襞皺撫之而亦喜撲之而不嗔似巨狸之攫  
足若卑大之纏身偶循隅而吐暗輒蒙訶而愴魂昔有  
大蟲之號今有小畜之云懊撐距之無時委降戢於非  
倫雖山君之短智亦梁鵞之淺仁見其弱而可弄牽以  
售而論斤有守犬其未足借虛名而守閭既爪牙之久  
折亦何威而見奔第周旋於苑薄得混迹於薨麇學婆  
娑而昵主戲嬰綽以娛賓感知音之君子被歎涕之殷

勤偉茲靈之巨猛鬱有武而有文偶胥吻之所及皆性命之相因論雄心與劍力固決乾而倒坤略網絰而風飛觸燦燦以雷噴哮怒則千人自廢憤蹶而萬瓦猶震非胥疏其有欲何牢檻之敢陳偶朶頤於跛羊落一髮於千鈞饑窘來而餌施利器往而性泯足人間之翫擾何氣決之可存諒如此而久生固不如即死之麒麟

文鹿賦

漢公孫詭

麀鹿濯濯來我槐庭食我槐葉懷我德聲質如絢縟文

如素綦呦呦相召小雅之詩歎丘山之比歲逢梁王於  
一時

由鹿賦

有序

唐

呂溫

貞元丁卯歲予南出襄樊之間遇野人繫鹿而至者問  
之答曰此為由鹿由此鹿以誘致羣鹿也備言其狀且  
曰此鹿每有所致輒鳴嚶不飲食者累日予喟然歎曰  
虞之即鹿也必以其類致之人之即人也亦必以其友  
致之寔繁有徒古之然矣嗟乎鹿無情而猶知痛傷人

之與謀宴安殘酷者彼何人所物微感深遂作賦曰

鹿之生兮亦秉亭毒備齒角以無競循性情而自牧姑  
有味於行止尚焉知乎倚伏捨爾崇林輕遊近麓偶巧  
網之生致蒙主人之全育飲以滌井飼於芳庭寢卧荃  
柔騰倚蘭馨露往霜來日安月寧雖矯性而非樂終感  
恩而不驚曾不知養非翫物用有深意命曰由鹿俾陷  
其類涼秋八月爽景清氣羈致山阿縻於蹊遂設伏以  
待翳叢而伺同氣相求誘之孔易將必慕侶宜云貪餌

呦呦和鳴虞虞狎至彼泯慮於猜信此無情於誠偽孰  
是倉卒禍生所忽毒鎬歟以星貫潛機劃其電發或洞  
胃而達腋或折足而碎骨望林蠻子非遠顧町疇兮未  
滅風嗥澤而北迅日掩山而西沒走駭侶於巖煙叫饑  
羸於澗月苟行路之聞者孰不心摧而思絕相爾由矣  
野心而仁望純束子驚惋顧獲車兮逡巡視鼎中之消  
爍觀机上之剖分忽哀鳴以感類若沉痛之在身雖復  
處之密邇享以豐珍比檻猿之駭躍同海鳥之愁辛敢

擇音而後死思走險其何因痛無知以相陷含惋毒而  
莫伸客有感而言曰物誠有諸人亦宜乎撫事或比原  
心則殊借如淮陰構禍冤在神理通說且拒稀謀寧起  
堂堂蕭公實曰知己紿致鍾室胡寧忍此呂祿之難誰  
非漢臣交則不義賣亦不仁彼美酈生既為交親誘襲  
軍印豈無他人於戲微獸傷類如不自容忍人賣友而  
享其功滅交道兮墜義風曾麋鹿之不若何仁信之可  
宗已焉哉諒此世之茫茫吾未見其始終

馴鹿賦

金  
李俊民

有足而跂有角而枝處山而適食野而肥一旦為雉兔  
者所獲遂見繫於藩籬不纏而縛不械而羈覩常如崖  
異履平如險熾野哉之性何異夫由也之見仲尼鄭人  
之夢鄭人之疑秦人之指秦人之欺逐母而歸未能如  
西巴之麋與犬而嬉慎勿效臨江之麋鹿兮鹿兮汝生  
我依我恩汝知不見夫人之子食其肉而寢其皮

御定歷代賦彙卷一百三十四



欽定四庫全書

御定歷代賦彙卷一百三十五

鳥獸

褚白馬賦

有序

宋顏延之

驥不稱力馬以龍名豈不以國尚威容軍馱趨迅而已  
實有騰光吐圖疇德瑞聖之符焉是以語崇其靈世榮  
其至我高祖之造宋也五方率職四隩入貢秘寶盈於  
王府文駟列乎華殿乃有乘輿褚白特稟逸異之姿妙

簡帝心用錫聖阜服御順志馳驟合度齒歷雖衰而藝  
美不忒襲養兼年恩隱周渥歲老氣殫斃於內棧少盡  
其力有惻上仁乃詔陪侍奉述中旨末臣庸蔽敢同獻  
賦其辭曰

維宋二十有二載盛烈光乎重葉武儀粵其肅陳文教  
迄已優洽泰階之平可升興王之軌既接訪國美於僖  
史考方載於往牒昔帝軒陟位飛黃服皇后唐膺錄赤  
文候日漢道亨而天驥呈才魏德懋而澤馬效質伊逸

倫之妙足自前代而間出並榮光於瑞典登郊歌乎司  
律所以崇衛威神扶護警蹕是用精曜叶從靈物咸秩  
暨明命之初基罄九區而率順有肆險以稟朔或踰遠  
而納賁聞王會之阜昌知函夏之克初總六服以收賢  
掩七戎而得駿蓋乘風之淑類實先景之洪肩故能代  
驂象輿歷配鈎陳齒算延長聲價隆振信聖祖之蕃錫  
留皇情而驟進徒觀其附筋樹骨垂梢植髮雙瞳夾鏡  
兩權協月異體峯生殊相逸發超攄絕夫塵轍驅驚迅

於滅沒簡偉塞門獻狀絳闕旦刷幽燕畫秣荆越敬  
不易之典訓人必書之舉惟帝惟祖爰游爰豫飛輶軒  
以戒道環鼓騎而清路勒五營使按部聲八鑾以節步  
具服金組兼飾丹腹寶鉸星纏鏤章霞布進迫遮迺却  
屬輦路啟聳擢以鴻驚時濩略而龍翥弭雄姿以奉引  
婉柔心而待御至於露滋月肅霜戾秋登王于興言闡  
肆威稜臨廣望坐百層科武藝品驍騰流藻周施和鈴  
重設睨影高鳴將超中折分馳迴場角壯永埒別輩越

羣絢練翼絕捷趨夫之敏手促華鼓之繁節經玄蹄而  
電散歷素支而冰裂膺門沫赭汗溝走血蹤迹迴唐畜  
怒未洩乾心降而微怡都人仰而朋悅妍變之態既畢  
凌遽之氣方屬跼鑣轡之牽制隘通都之圈束眷西極  
而驤首望朔雲而蹠足將使紫鷺駢衡錄蛇衛轡纖驪  
接趾秀騏齊于覲王母於崑墟要帝臺於宣嶽跨中州  
之轍迹窮神行之軌躅然而盤于遊畋作鏡前王肆於  
人上取悔義方天子乃輟駕迴慮息徒解裝鑒武穆憲

文光振民隱修國章戒出豕之敗御惕飛鳥之跼衡故  
祇慎乎所常忽敬備乎所未防輿有重輪之安馬無泛  
駕之佚處以濯龍之興委以紅粟之秩服養知仁從老  
得卒加弊帷收仆質天情周皇恩畢亂曰惟德動天神  
物儀兮於是駟駿亢階街兮稟靈月駟祖雲矯兮雄志  
倜儻精權奇兮既剛且淑服戰羈兮効足中黃徇驅馳  
兮願終惠養蔭本枝子竟先朝露長委離兮

白馬賦

宋  
劉義恭

惟皇有造惟靈有秘麗氣攝精底愛覃粹八埏稽首以  
賓庭九荒斂衽而納贄象車垂德以服箱龍馬宅仁而  
受轡是以周稱踰輪漢則天駟體自乾維衍生坎位伊  
赭白之為駿超絕世而稱驥爾其為狀也竦身輕足高  
顙露睛氣猛聲烈步速視明著獻西宛表德東京價傾  
幽夏觀竭都城飾金鑊之倏爍揚玉鑾之瓏玲發鳴鏑  
於懸月驅永埒於脩垌旋四介以作好耀二矛之重英  
舉舊閑而未儔考前迅而較名

渥洼馬賦

唐 喬 彝

域中之寶生乎天涯天子之馬產乎渥洼澤出騰黃獨  
降精於太一神開滇壑固不涉於流沙目散電兮彪駸  
喙含丹而虎牙躡紅雲而噴玉霑赤汗以攢花望兮以  
久來何晚邪應圖合謀光我帝業星通兩瞳月貼雙頰  
四蹄曳練翻瀚海之霜華一噴生風下胡山之木葉然  
後絡以金羈拂於鱗鬚晴射紫燄稍垂綠絲凝驕欲嘶  
嚼淒鏘之玉勒疊影不顧紛偃蹇之朱旗皇矣帝徹漢



網斯闕憑百萬之精勁倚四夷之磔裂屠蒲梢而亘大  
漠指二師而求汗血謂滅沒之未來竟羈縻而不絕有  
生必感有感必通通也不極環之無窮彼泓污之斗水  
乃幽贊於神功然後陲沙卷浪於馮夷之宮疊足側身  
於翕淪之中星精降子河嶽動天駟入兮驚駘空嗟我  
皇之英特而牽其惑欲能敗度多多涼德夏后九代越  
天地之紀穆皇八駿荒帝王之則而況金通月支價及  
疎勒悉復馳去終無所得此余吾之降生解倒懸於中

國祈招惜惜式昭德音感激萬古淒涼至今願以采求  
馬之人為求賢之使待馬之意為待賢之心

汗血馬賦

以絕足方駉流  
汗如珠為韻

唐

王損之

異彼天馬生於遠方每流汗以津潤如成血以熒煌所  
以名重駉驥價高驕驕骨騰肉飛既揮紅而沛艾麟超  
龍翥亦流汗以徜徉當其武皇耀兵二師服猛破大宛  
之殊俗獲斯馬於絕境由是辭虜塞以俱來望漢庭於  
遐騁初疑霖霖染瀚海之霜華終訝淋漓變榆關之霞

影及乎獻闕之始就駕之初飾金羈而勢如躡影排玉  
勒而態若凌虛伯樂乍觀訝霑襟而沃若王良載馭驚  
濺袖以班如觀其步驟如流驅馳若滅恣餘力而聳躍  
控中衢而夔絕長鳴向日蹀躞而色若渥丹驤首臨風  
奮迅而光如振血疾徐中節羈束如濡流膺臆以飛楮  
灑纓鬣以疑珠雄姿泛彼逸態濡于映白駒之羣皆疑  
失素齊紫燕之匹不可奪朱卓彼竒姿實為殊觀初溢  
腹而霑灑終盡足而渙汗此朱翼而表異難並駿良彼

赤鬣以稱奇，翻同款段超。騰莫及迅疾，難儔遽。赫如以  
浹洽，乍煥若以飛浮。儻遂越都，甚追風而更疾。如同過  
隙，似奔電以潛流。且其戢聯翩異，踳踖材逾良。駿名失  
逸足，儻不棄於血誠。將八鑾而齊蹕。

吳坂馬賦

以下觀泥驥迴  
知貴駒為韻

唐謝觀

吳坂之馬兮，駿且奇。伊孫陽兮，不知伏櫪而誰憐。拘絆  
倚輶，而但見清羸兩耳長垂。不斷於嘶風噴月，四蹄可  
式。何愁於玉勒金羈，當其初出渥洼。孰分駕驥雖白日。

之可逐曷青雲之自致頓銜驤首逢人子不鳴強鳴弄  
影超羣知己分未至須至嗟乎全無芻粟半卧沙泥況  
精靈之粗有亦毛骨以非低金埒行時儻拔風塵之跡  
玉鞭垂處願親桃李之蹊於是將躍未騰欲真尚假徘徊  
龍殿之側蹢躅鹽車之下良時易失常憐過隙之光  
朗鑒難逢多是迷途之者善相爰來精神陡迴奮迅而  
蝟毛俱聳嘶鳴而星眼俄開舊阜云辭步步而風雲借  
便長衢一去行行而珂珮相催曩夕猶賤凌晨已貴羣

心惕惕以暗伏衆口喧喧而相謂乍同曲突收將宮徵  
之音又似豐城指出斗牛之氣蓋非斯人無以辨龍駒  
非斯馬無以動震區固二者之冥契播一時之令圖馬  
兮雖遇新知還因舊主儻一顧之未替必載馳而可覩  
更有瑤池方外之程願者鞭於造父

獲大宛馬賦

以開遠戎得  
天馬為韻

唐  
胡直鈞

昔孝武寤善馬駕英才窮二師於海外獲汗血之龍媒  
於是宛卒大北神駒盡來駟駿奇狀超攄逸材走追風

於馬邑嘶逐日於雲堆因行師之勲著辨前王之業開  
當夫海西出征掣敵要遠始遲疑而不進承再命之爰  
晚奉皇風之用宣冀邊草之齊偃既量功就已料生返  
越窮海之沙塵及大宛之城苑既高勲以茂閔且不愧  
於分閭芻糧盡取駉驥亦空材為地產之最精降天山  
之中背不毛之殊俗從入律之東風沛艾骨異低昂氣  
雄溢鏡光於金勒流雪彩於花驄悉可耀威華夏奪魄  
獫戎若乃發跡窮荒來儀中國史驚千載之異朝慶一

人之德君子之德式乎天王之道允塞騰驤永埒曾何  
比於權奇滅沒長衢獨有賴於筋力然則馬惟行地居  
實統天黷兵者耗財之本愛財者有國之先徒知天馬  
之可獲莫痛征夫之寡全時泰俗饒固理道之所急珍  
禽奇獸在人君之可捐穆王之荒何取文帝之事足傳  
竟洽大東之詠異為天馬之篇況驥之生兮有矣屈之  
產也在馬復何必勤求於遠卒當耗譯之事邊向使武  
帝退術士寶賢者罷征戰於戎夷浹風俗於純嘏自將



致丹質之鳳鳥豈徒來汗血之龍馬故前代論邊之徒  
以勞師遠伐屈衆策之下

朔方獻千里馬賦

以題  
為韻

唐  
王起

駢彼名馬產茲元朔得遐方之勁氣是稟嚴凝應上聖  
之禎符其來縣邈固可以飾和鸞之鐵鐵就鈎膺之濯  
濯始其同羣豐草挺質寒鄉名超茲白瑞掩飛黃伊六  
轡之爰設非九重之孰當爾其走險鹿駭望雲龍驤繫  
之維之登歌不慙於西極若滅若沒獻狀聿來於北方

於以效伏皁之勤於以釋長鳴之怨流離而走血來格  
獲落而執勒斯獻計鴻鵠之舉彼未居多涉燕宋之遙  
我方適願柔心有待逸足未宣權奇於絳闕之下沛艾  
於紫庭之前稟月未匹追風莫先所以闡幽都之美所  
以增華殿之妍既信且閑軼其羣兮相萬視遠如邇遵  
其路兮且千一人既瞻八駿初比彼千駟花發六騶雲  
起其止也可齊乎足其行也無踰於里信愕視於華原  
而騰輝於良史伊茲駿之間出在前王而殊寡或鑒輅

而見損或鼓車而不捨我皇昭景福錫純嘏稱德以喻  
夫俊人服勞以勸夫忠者宜惟同兩漢之帝獲千里之  
馬

天馬賦

元  
陳泰

若有龍兮渥洼之子滎河之孫產自月窟來於大宛筋  
權竒而虎脊兮肉磊砢而峰巒精神變化不可測兮上  
貫乎房星之垣朝發蹤乎河濟子晡沒影乎崑崙雖有  
銜勒不暇顧兮彼輿隸其焉能援昔遭時之孔阮兮伏

卑樞而中頽隨驚駘而並駕子又或驕逞而相欺啖芻  
藋而不飽兮羌且菽之可期軌鹽車而登太行子路岩  
筦其險崎義和迫而將晏兮勢蒼黃而推萎翩翩之伯  
樂兮道安適而逢之泣然為子流涕兮爾何困乎此歎  
世貴賤之不分兮信馬用夫駿為解劒佩以為質兮吾  
將持子而西歸欲埽空夫大漠之野兮寧轢玄圃而騰  
崦嵫不然乘雲躡風載周穆而遠覽兮造王母乎瑤池  
於是天馬俯首噴沫振鬣仰吁物固各有所遇兮遇固

各有時向微子之超越兮骨委絕其誰知縱逸氣之凌厲兮獨不為子而徘徊儻一試而遽舍兮駕鼓車兮何悲伯樂復歎而為之歌曰天馬兮風駿批竹耳兮夾鏡瞳少不自見兮老愈工嗟哉蹭蹬兮吾知爾之為龍

天馬賦

元  
李朝瑞

蓋聞渥洼之水通天河而為一滴湟湟浹浹汨澤天馬於是出馬蹴踏乎九霄而升卓絕乎九地而立瞬息千里百獸為之震掉奮迅長鳴萬騎為之辟易所以大

宛之境欲一二畜之而不可得乃強擅其美於西極也  
飄忽動盪閃爍西東銳耳脫兔駭蹄超鴻散飛星於舉  
尾貫流電於垂瞳淋漓赤潘磊砢肉駿脊橫繡壁之霞  
耳削渭川之筒朝秣祁連之禾夕飲上池之淙不求知  
伯樂之顧不假馭王良之工爾其怪質若神權奇恢瑰  
雲興鳥逝馳驟風雨賁育羽獲不得為之羈驥駉騏驎  
不得並其偉凡晉之屈乘唐之肅爽蓋其飲聞厭見而  
不知其幾也昔在元封漢治盛隆諸福之物莫不畢至

是天馬者亦來鳳墀螭陛之宮此豈戈甲之力衛霍之  
功上有神武之君下有英傑之臣而渥洼之種靈異之  
物自致於天廄十二閑之中如龍興而雲如虎嘯而風  
又如巖壑之俊彥觀虞淵之曠曠煥然而起翕然而從  
是馬也方將服力金根之煒煜獻駿和鸞之玲瓏笑瑤  
池之仙子陋梨園之花驄也客有進而言曰子知馬之  
自天而不知天之所以為馬也易不云乎乾為天為龍  
為西北卦故天馬之出也於象為乾於方為西其超世

之雄且駛者皆乾道行健之餘自漢至今二千載矣而  
又見於文明盛麗之時此所以奉六龍之御天臨九有  
之師也言未既煙沙浙澁宇宙盤辟風髮霧鬣掠月戴  
日顧駑駘而已遠但見雲霄之四跡

天馬賦

元  
歐陽玄

繫房星之委精鍾天馬之權奇澡神質於渥洼砥勁氣  
於月氏貞非坤牝健本乾為上分扶輿之秀下孕蛭螭  
之精風雲資其格力雨露澤其光儀膺廣鳳臆鬣秀龍



鬐首昂渴烏之勢影捷枉矢之馳於是陋駒駉之產邁  
麒麟之姿驂六飛於廣漠舞九奏於希夷若乃朝刷崑  
崙夕秣玄圃駕緹笙之子晉道霞觴於王母風冉冉兮  
斯征靈續續兮來寧覽熙世之德輝屬萬物之欣覩願  
陪禁衛自獻西土乃命移中戒造父釋雲幕於金鞍映  
孚尹於瓊戶出則鏘和鸞驂輿組媼日馭之光華展天  
衢之步武然其氣質不可求之驪黃之餘其芻秣不可  
畀之皁櫪之伍峙玉山之殖未足供其斲委金臺之貨

未足議其估是知天馬固難得而不易畜也所以罕見  
於盛時僅聞於前古時則有倣鄒枚請賡樂府而客或  
難之曰時方歌鹿鳴之章子乃為天馬之賦得無馳駕  
鼓車者寧不與此而迴殊也哉嗟夫實不自貴以人而  
貴物不自異以人而異方神駒絢彩於水涯固期駕劣  
之同滯至其裂帑矢而庭實竟乃自齒於天駟信物美  
而無所遺分亦竒才之能自致負鹽車而上太行者慨  
未遇夫伯樂伏皁櫪而志千里者又何慙乎老驥振長

鬣而一嘶兮冀識余之所意塋埃風而上征兮願借翠  
雲以為鞍隨飛龍而上下兮羌先路其馬避彼宜乘虛  
而騰踏兮追雲逐電之可冀也庶幾求之玄黃之外兮  
則亦駿骨之可市也

虎文龍馬賦

有序

元  
郝經

乾陽萃精星列房駟健之至也故飛而在天則為龍行  
而在地則為馬雖八卦皆擬其象而獨專於乾坤負圖  
而出於河庖犧氏按之為畫聖人事業以之張本而文

籍生焉則又用之至也出於乾陽故產於西北陰國金  
天往往騰踏羣龍駟駿特異號稱龍種其蕃息盛大皆  
莫若國朝沙漠廣莫地經兩海盡為游牧之所又兼金  
源四十萬并西域三十國古之所謂千里者海飲川量  
婦人豎子皆乘御之搜奇拔異始得與御苑下乘今上  
所御虎文龍者空西北百千萬羣而未之有伯樂之所  
未見書傳之所不載古今之所罕聞又虎變炳然有定  
武功彰文德之象焉昔漢武帝得之外國而親為之歌

唐太宗之所御則圖畫凌煙閣而為之贊矧今生於本國又若是之異乎歌頌不作則與騶駘等為無聞敢犯齒路馬之罪而獻賦曰

天柱折地維絕東南傾西北揭隱日星為晝夜結陰陽為冰雪死土銜沙枯山積鐵白草失春黃榆不葉洞瀕幾萬餘里蹴踏幾千萬年蘊天馬之剛健混神龍之窟穴不知其幾萬餘羣幾千萬匹相我薄伐控弦立國不棧豆而秣粟不棗脯而齧膝盡風呵而雨止恣原阜而

野樵從橫散漫優游閒適全其所天故皆越逸一兵控  
百百不介一力有餘裕故皆蕃息瀾翻浪動川盈谷溢  
奮威靈以一戰獵諸國而無敵迄今四十有餘年矣我  
君中興真龍間生一氣直壯四星曜靈駭西域驚北庭  
飛黑水晦青冥辟崑崙雷霆煙雲墮地列缺生擗振  
長風而一嘶凡馬喑而不鳴六丁盼矐而弗執真宰辟  
易而弗乘於是飲余吾濯渥注褰鱗介脫角牙食萬馬  
而類駸化一龍而若騶質金大而墨章黎剪刀而互呀

變乾坤之至文散玄黃以為花會運數以呈用來馴服  
於帝家頭骨隱戟面顴夾壁豎目日出陽鑑電激膺門  
肉闊汗溝血滴垂梢絲齊分鬣髮直露筋藏骨玉蹄鐵  
脊前鳳後兔宛轉却顧飛燕掠地輕不著土奔軼滅沒  
掣去縱步東西有日天地無路倏忽變化匪龍匪虎逍  
遙良善遇知得主帝軒之飛黃后唐之赤文周王之騄  
駟漢武之天驕魏文之澤馬殆皆不得同年而語矣於  
是帝亦惠異登進上廡一品芻秣萬乘之右鉸袂實錯

鞍勒珍鏤金勒玉鞭服習馳驟建旆西出足力騫張渴  
飲泅水怒蹴點蒼萬里一息建業興王吸絕江流瞰視  
武昌朝楚暮燕載會衣裳新宮法駕金蓮正香飛龍在  
天遂卻走馬和鑾雍雍垂拱而治天下視彼夸毗盤于  
遊畋放心事侈黷武求仙奔貳師走嫖姚志欲無已焉  
則又天淵之懸也亂曰嗟異馬兮遇主知虎為龍兮風  
雲期奮靈虬兮躍神螭隘萬里兮強一馳乾坤小兮日  
月低適時乘兮加韁羈效侏儻兮呈權奇宣皇靈兮耀



主威朝江南兮暮遼西功德盛兮天人歸飾玉輅兮開  
金扉馬在廐兮方無為

龍馬賦

有序

明  
羅汝敬

永樂十八年青之諸城產龍馬其鱗甲龍也其鬚鬣亦  
龍也其文臆賴尾形色光彩步趨意態又皆龍也奇哉  
瑞乎邑之產產異而告於其長以獻闕庭臣謹按史冊  
云龍隨方而至所以彰明君德表應太平今龍馬產東  
方其色蒼而青聖德所致固可見矣矧夫大禹成治功

而神馬呈義皇宣人文而馬圖出今皇上為兆民開萬  
世太平之基以建北京而龍馬適見感召之機豈偶然  
哉臣職司紀述不勝忻忭謹拜手稽首而獻賦曰

有神物兮叶坤之貞符乾之靈含秀月窟播品東溟繫  
騄駼兮毓質蒼龍兮降精方其震電倏爍風雨晦冥房  
星駁兮移次川后翕兮效禎匪渥洼之異產信滎河兮  
同徵有產者珉載盱載傾爰告於邑爰陳於庭於時天  
開黃道雲駐霓旌聖皇穆兮當宁百辟儼兮盈廷諸福

畢至奇祥皆呈乃瞻乃顧乃陟乃登並騶虞兮同列翊  
瑞象兮偕行旅玉獅兮為友耦祥麟兮作朋恍矜己之  
遭遇仰金鋪兮長鳴肉駿礮礪兮玉甲精瑩首昂渴烏  
兮尾掉長鯨蘭筋權奇兮鳳臆驍騰卧則虬伏子動則  
雲興燦河洛之文背絢麟罽兮鏤膺耳批竹兮錐卓蹄  
踣鐵兮風輕五彩煜兮霞綺隅目睽兮電行澄匹練兮  
雪花凝澗驪珠兮流霞頰元氣氤氲兮瑞霜蒸雄姿傲  
儼兮馴不驚朝飽玉山兮珍粒夕飲太液子清冷神竦

赤墀光涵繡楹方臯曾不能以得其髣髴韓幹安能以  
貌其容形爾時聖皇篤天之祐宅是北京禮玉帛兮交  
錯將園丘兮告成爾乃載駱法駕七就繁纓實勒銜玉  
錦羈樓璠躡浮雲兮御天巡六位兮時乘彰聖德兮合  
清寧兆萬世兮昭文明臣乃載拜手稽首而復為之歌  
曰龍馬兮翩翩神變化兮合自然雲為黃屋兮風為輶  
熊羆夔臯兮相後先奉時巡兮周八埏永樂昇平萬萬  
年

驄馬賦

明 陳 連

房星委精驄馬下生風駿霧鬣鳳臆龍睛燦連錢之可  
數紛赭汗之交凝耀采沙苑澡神清泠逸足超羣調良  
可稱初其未遇伏於槽檻與駑駘而並處雖神駿其誰  
識厄鹽車兮垂兩耳歷羊腸兮空歎息偶繡衣之相逢  
贖千金而不惜唯烏府之清華幸依棲而託迹揚鬚振  
鬣百獸為之震驚奮迅長鳴萬騎為之辟易當夫沙堤  
雨霽馳道春融繡衣朝謁冠蓋憧憧朱衣前導驄兮實

從矯矯子若鯨躍乎滄海昂昂然猶鶴出乎樊籠奮霜  
蹄而踏鐵舒逸氣而吐虹雖驂騑與駉駉亦皆在其下  
風至若蓐收司辰秋氣愈厲柏府深嚴蘭臺清閤白簡  
與秋典共清厲冠與繡衣同麗爰有執法之臣稱為直  
指之使入覲龍顏出辭螭陛奉綸音以廉察持玉斧而  
徑逝於以埋張綱之輪於以攬范滂之轡玉潔冰清鷹  
隼視姦貪為之屏息權豪為之喪氣非望塵而跼蹐  
或顧影而驚避雖原隰之逶迤亦無遠而弗至非徒恣

山水之嬉遊蓋在洗冤而伸滯嗟夫物不自貴以人而貴物不自異以人而異此驄馬所以稱德於烏臺而表祥於房駟故其不獨顯於桓典之時而實重於聖明之世因為之歌曰初未遇兮駕駘與同倏騰踏而奮迅兮幸繡衣之逢

廐馬賦

有序

明  
陳東

夫八駿著驂騑之稱九軼標絕塵之號豈非名因才立奇繇用顯若迺中廐之馬以良見收然而吉行不過十

里仗立罔置一鳴而絡玉羈金席牀啗脯至與駕駘並  
論豈其志乎感漆園真性之云聊為賦之

偉軼異之絕足兮爛騰祥而符聖孕房駟之靈精兮夔  
呈圖而表應合乾德兮翹傑配坤行兮凌競光儵爚而  
龍見文蔚然而豹炳剡雙耳而削筍頰兩瞳之夾鏡爾  
其挺珍濛汜效異余吾神超飛兔態絕駒駘星流天世  
雲籥電趨朝凌碣石夕歷姑餘曳吳門之足練溫齊侯  
之畫圖秦牙莫測其妙理馬援尚失於範模管青不能



得之臍胸女厲無所眇於膺臚體容與而翹跲抱明姤  
以毫舒惟盛美之龔備雖夫人其舍諸爾迺遴駿東臯  
獻奇北塞壯旅闕庭隸分房膺芳銖肸蠁靈牀爽塏幸  
路兒之解仇就小童而去害托圉牧於六閑並驕駃於  
一概譽玳珂之鏘錚纓弁纓之綵縹參渥恩之游加非  
真性之適在抑曠志而未馴或遡風而沛艾乍趨迅而  
中蹇怵鞭箠之洎逮踈足服帶垂梢聽調客形外澤主  
神內消棍斷斷以馭駢閔猓猓而遠姚赧秣鼓於甘露

慨望斷於流飈若夫挈壺吐盡長樂雞啗雉臯色辨魚  
鑰洞開夙羈實絡昕時璇階於時黼座天臨師寮羣戾  
鸞旂簇萬龍墀夾二駮鼉警而怔忡睇魚須而瞠眦聞  
鼓鐘而忿躍啾驤騰以踣地雄倪曾未作於髣髴驚牧  
已見嗔其踈跼心煩而赭流羌又怒霑宇碱祀若迺  
玄時肇裡黃祇報祐辟雍班數明堂配祖雲整法興星  
陳皇輅七駟夾轍以崇衛六虬方斬而翼扈駢蚪蛭以  
雷起塊虛驕而森翦紺金鏐而不前噦玉鑾其有度左

轟紛其督明方欽飛以掣步聊侵淫以驪駟至踟躕而  
才于羸羸共馳惆悵疇與夷世脩文軍容偃武曾是吉  
行累期間舉然而役不逾時騁無遐路道鑣未市於郊  
畛前轡已迴於隍潏撐浮雲使不揚蹄絕塵其安驚瞻  
脩馘以長嘖結幽悵而延佇隕權奇於攝僚凋滅沒乎  
驄駐昔鄭嗣知用而佑貴漢文量才而却受武帝罷師  
以釣奇昭王縣金而設購彼已達策馭之宜用舍中才  
賢之穀塞翁已矣伯氏難遺慮賈勇以招尤甘專心而

順畜雖駕鼓以猶任况聞香而不艱神縈縈而頤羣意  
愴愴其戀豆懷殊姿而自疑曷神駒之可剖儻垂瞳於  
路輅尚昂鳴於華殿

舞馬賦

宋 謝 莊

天子馭三光總萬寓挹雲經之留憲裁河書之遺矩是  
以德澤上昭天下漏泉符瑞之慶咸屬榮懷之應必躔  
月晷呈祥乾維效氣賦景河房承靈天駟陵原郊而漸  
影躍流泉而泳質辭水穴而南徠去輪臺而東暨乘玉

塞而歸竇奄芝庭而獻祕及其養安騏校進駕龍涓輝  
大馭於國阜育上襄於帝閑超益野而踰綠地軼蘭池  
而轢紫燕五王晦其術十氏惜其玄東門豈或狀西河  
不能傳既秣苞以均性又佩衡以崇躅卷雄神於綺文  
蓄奔容於帷燭蘊籟雲之銳景載追電之逸足方疊銘  
於丹鎬亦聯規於朱駮觀其雙壁應範三封中圖玄骨  
滿燕室虛陽理竟潛策紆汗飛楮沫流朱至於肆夏已  
升采齊既薦始徘徊而龍俛終沃若而鸞盼迎調露於

飛鍾赴承雲於驚箭寫秦垌之躡塵狀吳門之曳練窮  
虞庭之蹈蹠究遺野之環柱若夫蹠實之態未卷凌速  
之氣方攄歷岱野而過碣石跨滄流而軼姑餘朝送日  
於西坂夕歸風於北都尋瓊宮於倏瞬望銀臺於須臾  
若乃日宣重光德星昭衍國稱梁岱佇蹕史言壇場望  
踐鄙上之瑞彰江間之禎闡榮鏡之運既臻會昌之歷  
已辨感五繇之程符鑒羣后之薦典聖主將有事於東  
嶽禮也於是順斗極乘次躔戒懸日於昭旦命月題於

上年駢駢翼翼泛修風而浮慶煙肅肅雍雍引八神而  
詔九仙下齊郊而掩配林集羸里而降祊田蒲軒次獻  
瑄璧承絜金檢茲發玉牒斯刊盛節之義洽升中之禮  
殫億兆悅精祇歡聆萬歲於曾岫燭神光於紫壇是以  
擊轅之蹈撫埃之舞相與而歌曰聳朝蓋兮泛晨霞靈  
之來兮雲漢華山有壽兮松有茂祚神極兮貺皇家然  
後悟聖朝之績號慶榮之烈比盛乎天地爭明乎日月  
茂實冠於胥庭鴻名邁於勛發業底於告成道臻乎報

謁魏魏乎蕩蕩乎民無得而稱焉

舞馬賦

有序

梁  
張率

臣聞天用莫如龍地用莫如馬故禮稱驪驥詩誦駟駉  
先景遺風之美世所得聞吐國騰光之異有時而出洎  
我大梁光有區夏廣運自中圓照無外日入之所浮深  
委贄風被之域越險效珍軫服烏號之駿駒駉秦龍之  
名而河南又獻赤龍駒有奇貌絕足能拜善舞天子異  
之使臣作賦曰



維梁受命四載元符既臻協律之事具舉膠庠之教必  
陳檀輿之用已偃玉輅之御方巡考帝文而率通披皇  
圖以大觀慶惟道而必先靈匪聖其誰贊見河龍之瑞  
唐矚天馬之禎漢既叶符而比德且同條而共貫詢國  
美於斯今邁皇王於曩昔散大明以燭幽揚義聲而遠  
斥固施之於不窮諒無所乎朝夕並承流以請吏咸向  
風而率職納奇貢於絕區致龍媒於殊域伊況古而赤  
文爰在茲而朱翼既效德於炎運亦表祥於尚色資皎

月而載生祖河房而挺授種北唐之絕類嗣西苑之鴻  
胄稟妙足而逸倫有殊姿而特茂善環旋於齊夏知蹈  
躑於金奏超六種於周閑踰八品於漢殿伊自然之有  
質寧改觀於肥瘦豈徒服阜而養安與進駕以馳驟爾  
其挾尺縣鑿之辨附蟬伏兔之別十形五觀之姿三毛  
八肉之勢臣何得而稱焉固已詳於前製徒觀其神爽  
視其豪異軼跨野而忽踰輪齊秀騏而並末駟貶代盤  
而陋小革越定單而少天驥信無等於漏面孰有取於

決鼻可以述章亥之所未遊踰禹益之所未至將不得  
而屈指亦何暇以理轡若跡遍而忘反非我皇之所事  
方潤色於前古邈深文而儲思既而機事多暇青春未  
移時惟上巳美景在斯遵鎬飲之故實陳洛讌之舊儀  
漕伊川而分派引激水以回池集國良於民雋列樹茂  
於皇枝紛高冠以連袪鏘鳴玉而肩隨清輦道於上林  
肅華臺之金座望發色於綠苞佇流芬於紫裏聽磬鐃  
之畢舉聆韶夏之咸播承六奏之既闋及九變之已成

均儀禽於唐序同舞獸於虞廷懷夏后之九代想陳王之紫駢乃命涓人效良駿經周衛入鉤陳言右牽之已來寧執扑而後進既傾首於律同又蹠足於鼓振擢龍首回鹿軀晚兩鏡感雙危既就塲而雅拜時赴曲而徐趨敏蹠中於促節捷繁外於驚桴騏行驥動虎發龍驤雀躍燕集鵠引鳬翔妍七盤之綽約陵九劍之抑揚豈借儀於褕袂寧假器於髮皇婉脊投頌俛膺合雅露沫歆紅沾汗流赭乃却走於集靈馴惠養於豐夏鬱風雷

之壯心思展足於南野若彼符瑞之富可以臻介丘而  
昭卒業縉紳羣后誠希末光天子深穆為度未之訪也  
何則進讓殊事宜非帝者之彌文哉今四衛外封五岳  
內鄙宜弘下禪之規增上封之訓背清都而日行指云  
郊而玄運將絕塵而弭轍類飛鳥與駟驢總三才而驅  
騫按五御而超攄翳卿雲於華蓋翼條風於屬車無逸  
御於玉軫不泛駕於金輿飾中岳之絕軌營奉高之舊  
墟訓厚貺於人神弘施育於黎獻垂景炎於長世集繁

社於斯萬在庸臣之方剛有從軍之大願必自茲而展  
采將同畀於庖輝悼長卿之遺書憫周南之留恨

舞馬賦

以奏之天庭  
為韻有序

唐  
闕名

書曰擊石拊石百獸率舞是知時貞而物應德博則化  
光故九有宅心萬方惟允我開元聖文神武皇帝陛下  
懋建皇極丕承寶命揚五聖之耿光安兆民於反側功  
成道備作樂崇德上以殷薦祖宗下以導達情性則有  
天馬絕足來從東道出天庭而屢舞仰皇心而載悅豈

止綠錯開圖分九疇於夏后汗滿走血服四夷於漢皇  
而已哉野人沐浴聖造與觀盛德敢述蹈舞之事而賦  
之

皇帝叶天行乘春候張廣樂而化通鬼神徵舞馬而懷  
柔奔走爾其聆音却立赴節騰湊顧遲影而傾心效長  
鳴而引脰徘徊振迅類威鳳之來儀指顧倏忽若騰猿  
之驚透眄鐘鼓而載止暢簫韶之九奏洎宛跡遲遲汗  
血生姿順指不動因心所之日照金羈而晴光交映風

飄錦覆而淑氣相資顧以退而未即將欲進而復疑絕  
節交衢而大人相慶赴曲齊列而皇心則怡豈若檀溪  
水上章臺路前塵埋玉勒汗濕金鞭竟空疲於力用固  
無取於當年孰若矯足騰推婉柔姿而近日驚身聳躍  
矯逸態於鈞天別有假象天星因時降靈雙瞳夾鏡而  
異質兩顧夾月而殊形出渥洼兮道已泰歷具坂兮心  
匪寧願因百獸之相率舞聖德於天庭

舞馬賦

以奏之天  
庭為韻

唐

闕

名



渥注之駿兮逸羣特秀簡偉之來兮稀代是覲豈憚夫  
行地無疆是美其承天之祐弭雄心以順軌習率舞而  
初就因大樂以逞狀隨伶官而入奏樂彼皇道上委折  
於一人狎節廣場下歡心於百獸飾金鏐頓紅綾顙却  
略以鳳態終宛轉而龍姿或進寸而退尺時左之而右  
之至如鼉鼓歷考龍笛昭宣知執轡之有節乃蹀足而  
爭先隨曲變而貌無停趣因矜固而態有遺妍既習之  
於規矩或奉之以周旋迫而觀焉若桃花動而順吹遠

而察之類電影倏而橫天固絕倫之妙有豈衆伎之齊  
焉我皇端拱無事垂意至寧惜惜正聲以九變而合樂  
逐逐良馬終萬舞而在庭宣比夫漢皇取樂而同轡魯  
侯空牧而在垠以今古而匹敵何長短之相形

古駿賦

唐  
牛上士

寒關月壯羽書南向虜馬秋肥胡兵犯障耀烽夜驚候  
馬相望雲橫朔塞之前雪滿天山之上於是天子按劍  
將軍事邊雷驅甲卒直指幽燕風蓬蓬而出海波漫漫

而騰天當鴈門而北上薄龍沙而左旋既而漢虜齊兵  
三軍合陣虹旗孳埽鼓聲雷振奕奕熊羆森森鋒刃或  
左提而右拂乍一留而一進則有俠少鷁賊雄駒捷疾  
耳若插筩顚疑削出跼金鑣以弄影控鐵銜而齧膝始  
驂驔以舞風忽濩略而追日蒙具裝擇組練雜然一往  
鼓仆旗旋足不得搖目不得眄超騰絕壑走及奔箭疑  
隔漢之流星似披雲而出電左賢為之膽懾骨都為之  
頷戰飛奔肅肅恣意馳逐宛若遊龍行如驚鹿左右披

欽定四庫全書

卷一百三十五

靡東西往復滿感汗以朱殷毛拂霜而蜩縮蕭條萬里  
顧盼翹陸橫塞上以長嘶餘聲振於山谷沉乃項籍英  
雄驅馳冠戎旗翻落日劒倚長虹惜良驄之不逝歌美  
人於帳中摧拔山之氣泄指烏江而路窮遂使畢會戰  
場挑身鋒鏑人控馬以騰踊馬隨人而奮擊轉足生風  
箭塵無迹跳山超澗冒刃衝敵突圍則漢將奔波怒目  
則追軍辟易遭楚王之不利當壯年之虛擲也別有渥  
水龍媒朱旄逸才雙瞳目耀五色花開逢漢王之棄置

跼吳坂以徘徊思效技於金埒願追仙於玉臺懷玉臺  
兮傷遠道朝朝暮暮銜枯草千金買骨君儻知百萬交  
錢猶未老垂兩耳兮伏鹽車倚雙轡兮慙蹇驢絆權奇  
而不用空個儻其馬如

燕王市駿骨賦

以求骨於好驥  
驥雲集為韻

唐 闕名

昔燕王思良馬以扶輶搜揚未獲寤寐而求以為激貪  
可以動物明誠可以感幽乃市乎死駿之骨比飛黃與  
驊騮則有權奇之類個儻之儔既淪精於一代理朽骨

於千秋甘委土以從棄忽兼金而見留爾其愜意如生  
沉吟未歇朔風至若聞其激揚纖塵飛想見其滅沒用  
已息於躡影狀猶存乎挾月匪亢貨賄殊巨象之焚身  
不薦宗祧異立龜之祀骨嗟夫君之愛彼彼竟奚為雖  
云力則無展儻亦魂而有知思實殊常誠所謂汗血而  
匪恨生如可再思所願肉骨以效奇既而視同龜玉之  
珍藏諸韞櫝之與衆既美其惟一孰不從其所好於是  
不遠而致貢然來思競選奇而往矣爭簡異而歸之迭

進驤裏爭呈秀驕包在垆於魯頌掩食場於周詩豈非  
結之以志感之以類寸誠式乎片骨罔棄不降階而屈  
身果鱗集而縻至詎比夫虞公懷諫竟貪屈產之良漢  
武勞師遠取大宛之驪乃知市骨以求駿馬則其至成  
羣築臺而尊郭隗則其從如雲骨何施焉姑明好駿之  
意隗未足也且表樂賢之君至矣哉可垂規於典墳國  
家皇極立洪勳集安輪之騁尚無數側席之求如不及  
儻駿骨之已收欲騰驤而見繫

市駿骨賦

以買元招生騰  
方必至為韻

唐  
韋執誼

代有良驥勤求可致上心好也固有開而必先朽骨沽  
諸蓋不期而自至於是搜賢廐發屠肆出千金而易之  
獲一骼而無棄不賈其用雖增飾而無成將慮其先使  
雄名而不墜昔之服纓玉飾軌條追長風而噴沫先急  
景而揚鑣豈知駟駿足於千里摧壯心於一朝權舍月  
而其落啼帶雪而俱銷當其死而不顧豈其生而可招  
是以服其無數守而無失外揚嘉善之名內作旁求之



術伊希代之異產固入用而無必處南中之穴莫測從來遊北土之泉始將安出聿求既彰類聚其方人獻驥驥天降此祥滅虞之役不興取諸外廐伐燕之師不舉貢自遐荒蓋將翕必張期於至止俾善始而令終寧賤目而貴耳假其力既重之於生思其勞曷輕之於死物以德易道由人弘當不遇其知乃負車而伏櫪苟應乎其感必蚪躍而龍騰故八駿咸臻萬邦為楷物非其產將命逾遠而米骨在於斯何惜發幣而買亦猶賢士所

趣知機彙征田忌收老以成仁卒強齊國燕昭市骨而  
種德乃獲樂生覩求賢之未暢悟得駿之非輕儻長鳴  
之見識庶吾道之將行

千金市駿骨賦

以題  
為韻

唐張仲素

良金可聚駿骨難遇傳名豈限乎生死賈價寧親乎金  
貝伊前王之善誘賴下臣之素數滿羸初訝乎一空絕  
足終欣其薦赴故郭隗發求馬之術使燕昭興築臺之  
務賢為國寶昔見載之於經馬以龍名後亦表之於賦

當其勤求未至思慮益專安得懸軒而就勒空聞馳荆  
而刷燕多亦奚為每厭倦於凡類愛而不見寧惜費於  
且千蓋為傾心於延望之日市骨寔由生之年其志著  
其謀宣非獨自馬而獲馬此實因賢而訪賢何異祿豐  
而遊士可集餌美而潛魚必懸夫其取與之分戒其鄙  
吝是非罔惑孰敢妄進苟能賤貨以沽名果乃愜心而  
得駿斯骨也當填溝壑誰分天驥之上才縱視丹青豈  
辨靈螭之洪肩幸特達而見重使聲價之復振至若唐

公驕驕穆王駉驪代勞馳路追奔結軌陳力效能死而  
後已宜若稱德之際交義之始金侔龜形骨異象齒求  
馬事殊於漢日懸之數合於秦市智能測遠利用鉤深  
叶田方之念諧季札之心敦信外彰表然諾於匪石沉  
機內密重枯朽於捐金想夫嘶風頰影垂髯植髮雖仆  
質於樊帷曾受精於皎月蒙君子一顧之渥恩知異窮  
塵之委骨

銅馬賦

以鑄金象形用  
求良駿為韻

唐  
紀于俞

昔伏波資越銅之具皇漢得天馬之度蓋以張戎容程  
國步允稱其德懷致遠之無疆既授於師必命工而所  
鑄象物惟肖利人則深斫精以範酌憲於心始察形而  
視骨遂修火以鎔金煥若中起昂然四臨望丹闕以就  
日俯玄墀而擇陰俾夫司僕載馳別於羣而是仰倌人  
匪懈御於王而審象疑顧影以權竒乍含輝而爛朗由  
茲而明式遐布觀我而逸材利往即山為類且尚其功  
存斲草無施敢勞於惠養徒想其屹以沛艾爛兮晶熒

狀赤文而呈瑞方候日於堯庭超乎獨立的爾殊形訝  
騏驎之變態聿登歌於彼駟叶以陰德稟於地靈列君  
軒之粹異咸此駿之儀形是知法與人共思衆材而膺  
國用王惟智周寫弘範而俾營求矧乎操其物於精剛  
制其器於質良克絕奔踦邈無玄黃雖齊力齊毫用每  
虧於典禮逮如龍如虎形既造而昭彰美成式之不替  
信改鑄之有常奚絕塵之足比庶出水而同方者哉銅  
為寶兮固越俗之所擯馬之神也仰漢庭而未進猗善

相以來歸宣康衢之增駿乎

萬年縣試金馬式賦

以漢朝鑄金為名馬式為韻

唐

呂 鐔

馬以行地致用式乃範金取規表騏驥以立則擬形容  
而可知合諸法象遵彼權奇卓爾趨姿想從革而乍見  
駭茲殊相疑軼塵而載馳毫髮盡此纖穠不差誠駿骨  
之侔儻亦巧心之云為本其稱自前朝制於往漢金也  
者持堅剛之可久式也者驗逸異而有案形乃辨於千  
里功詎勞於萬鍛匪刻鶴之同科宣偶人而齊貫載鍊

載精我馬是程武眷乍覩龍文可名星氣想合金光發  
明蛻足不前如俟孫陽之顧望雲邈視寧殊注水之生  
向日而疑將奮影臨風而狀若長鳴曲盡其趣不愆於  
素寫逸態以全能制蘭筋而巧附腫雙鏡而可鑒顧兩  
月以合度謂天驥之呈材乃良金之所鑄取則不遠其  
象孔昭常矯矯以示象特昂昂而建標騷裊在目飛黃  
立朝哂求市之三年終觀駿死無相肥於一槩何慮駒  
跳所以稽乎驥德垂此作式指半漢以成規宜駑駘之



可感置於宮壺有待獻書之賢鑄以越銅載假伏波之  
力事與名遠理將意深寧俟造父之能馴驛騶乃覲何  
必九方之善相驪牝獨尋等循形以觀影咸得駿於斯  
金故曰考茲術也選無違者可以斷臧否明取舍形分  
似是類別真假欲獻狀於國門期一中於名馬

萬年縣試金馬式賦

以漢朝鑄金為  
名馬式為韻

唐王起

先賢鑄金之英為馬之形馬無疆而致用金不朽而垂  
名瞻之在前則至寶山立寂然不動則異體峰平固將

六龍可驗八駿斯營遐迫絕足遠契長鳴宜徒翫熒煌  
之彩眇熠燿之情哉始其模既全體將具思求絕塵之  
貌是假在銘之鑄踴躍其液渥注之形未出撲滅其煙  
浮雲之姿已露方中矩分圓中規勢倜儻兮精權竒誠  
可傳而可繼每不驅而不馳其巧既畢安貞莫移豈貪  
夫而是徇諒工者之所為若乃大閱羣騶旁搜萬國獻  
絳闕而咸萃亢華殿而尚惑乃審厥象俾臻其極仰從  
革之輝光知代勞之軌則駑駘皆至自乖百鍊之形駟

駿俱來允叶萬邦之武其狀惟肖其儀孔昭仰沛文以  
龍翥若驂驪而鹿超摧秣勿施異乘黃之伏阜繫維罔  
及殊楮白之來朝翼翼雄姿煌煌壯觀恒引耀以錯落  
每騰精而斗漢牛以石兮多慙池以銅兮非翫是知武  
皇之制博伏波之旨深用之則行昔飛聲於東道確乎  
不拔終成象於南金高門洞闢秘殿旁臨將萬古以駭  
目俾四方而宅心豈作賂大宛其形見棄為神蜀郡厥  
祀方歆者哉固宜無逃於衆寡不昧於取舍永作鏡於

域中比懸衡於天下則稱驥德頌駟牧者未若似是而非常以馬而喻馬

馬惜錦障泥賦

以因立路傍愁  
濡美飾為韻

唐

王 榮

王武子所馭之駒障泥特殊念美錦以斯裂對深泉而不適拂玉鐙以雙垂常憐煥爛突金羈而屢顧豈忍沾濡始夫駿骨是求奇蹤斯得將以絳革之盛遂備乾連之飾莫不價重千金絲分五色初傾豪貴矜誇之意則多誰謂驂騑顧惜之心亦極觀其萋菲熒煌霞舒翼張

隱映桃花之色鮮明紫貝之章況乎還鄉曾衣照地出  
光得不春苑閒遊愁露濕於花下長衢載驟恐塵侵於  
道傍若夫噴玉柳堤揚鑣蘭路通步障於齊美映流蘇  
而掩嫋瞻前顧後雖無還淖之虞時止時行似有漸車  
之懼一旦澆漾將涉權奇少留誠淺深之未測眄侍從  
以如愁頻頓紅纓雖造父而寧知所以潛憂綠地縱孫  
陽而莫究其由武子於是探彼柔心察其深旨善知騷  
衷之欲必為蒲桃之美令左右以解之果騰驟而濟矣

然復被其身傍迷繡輪夾汗溝而綺麗排帶尾以花新  
向若輕革煥渡淪則王氏樞中空有代勞之用晉朝  
書上全無稱德之因懿夫特稟超奇非由服習苟嘶風  
之性斯惠宜戀主之名空立若論彼滋侈則錦障非所  
急

慾驥賦

魏應璩

慾良驥之不遇兮何屯否之弘多抱天飛之神號兮悲  
當世之莫知赴玄谷之漸塗兮陟高岡之峻崖懼僕夫

之嚴策兮載悚慄而奔馳懷殊姿而困遇兮願遠跡而  
自舒思奮行而驤首兮叩纏縲之紛拏牽繁轡而增制  
兮心惱結而盤紆涉通達而方舉兮迫輿僕之我拘抱  
精誠而不暢兮鬱神足而不摠思篩翁於西土兮望伯  
氏於東隅願浮軒於千里兮曜華軌乎天衢瞻前軌而  
促節兮顧後乘而踟躕展心力於知己兮甘邁遠而忘  
劬哀二詰之殊世兮時不邁乎良造制銜轡於常御兮  
安獲騁於遐道

相馬賦

唐 武少儀

徐先生相馬不相色不相力相其德與乎不可測何以  
徵之鬣青絲兮風生眼黃金兮電光蹄盤攤而散花毛  
翕施而成章衆人觀之已駢於路傍不啻於堵牆一曰  
為龍一曰為鹿中間何敢乎比方先生則異於是忘筌  
於毛質之外引鏡於肺腑之裏見其心兮如思勿思見  
其目兮如視非視虛舟為動喬木為止合大道而自然  
喪一齊至人而何處有以若此者足不以遵地影不以



遂形騰六合歟四溟截飛鳥遺流星日車為之不轉風  
馭為之中停二師為之罷貢伯樂為之焚經卓然擅天  
下名宜乎不爾直中繩曲中鈎徘徊閭闔之遊圓中規  
方中矩蛻螭交衛之舞亦以其次噫徐公不至驚駘共  
阜於騏驎徐公一來騏驎出羣於驚駘由此觀之世上  
賢才用則虎否則鼠何以異哉小人也內頌無國馬之  
賢遇君有徐公之術早已蒙於一顧至今長鳴猶未騁  
於千里更思剪拂超然自得恍然自失儻受恩分果如

前則平生之願畢矣

哀馬賦

有序

宋劉子翬

叛軍繼踵入閩驅竊戰騎過山嶺悉多殞敗余感之作  
哀馬賦

嗟哉何閩山之險絕乎方井陘而曠趙視劔閣而夷蜀  
峻嶺標樹橫懸掛瀑宮堯律屹縈紆阻複勢將平而驟  
起塗稍順而仍曲穴壁寄棧沿崖轉躅晝倚石以傳餐  
暮捫蘿而假宿非戀土之邦人嗟此來而何欲棲危走

險禽疲獸伏墮峻木之升孫礙層霄之飛鵠矧萬馬之  
南奔列長鑣而競逐訝四達之通達忽絲連而絳屬搶  
攘迫塞互相擠觸前顛後升平坑翳瀆銜哀結憤而叢  
殂萃萎者十幾五六焉幸而生者皆垂頭顧影低推局  
促鹿駭鷹驚鷗蹲蜎縮脊伶俚而卦露尾焦蕭而帚禿  
鼻咯乾埃肺傷芒敕望長坂以悲嘶想清波而浮浴癘  
瘡瘡煩指牆攄木集彼蚤蠅紛紜緣撲競啞穢而吞腥  
肆脣刀而舌鉞忽振體而驚飛去未遙而旋復慰已貪

怵忘余楚毒當附驥而乞憐知汝曹之碌碌困甚隕飛  
憂同敵觥駕鹽車則躡跡於黔中之步售屠肆則比價  
於遼東之肉悲夫吾聞之秦趙亘野燕齊迴陸數騎風  
馳萬夫麟威殫影動分鋒已交鼓聲酣分戰方熟莫不  
虎態龍姿雲鬣電目負甲士之千鈞望沙河而一蹴既  
却銳以摧堅咸蹂都而踐國蓋時清則龜龍麟鳳呈祥  
表瑞獻圖負錄俾之排難濟艱雖獲千角而網萬翎曾  
不及夫一驥之足噫今日治邪亂邪胡棄茲而弗畜彼

踈齧恃性驚駘共族渴飲天河之浪飢耗太倉之粟徒  
鵜飾文繡轡搖金玉偶備數於六閑氣驕矜而動俗責  
致遠之奇功必興傾而載覆事既失而懲懲亦何勞於  
鞭扑悼汗血之云亡捐百軀而安贖舟臨川而墜楫車  
向塗而裂軸激壯士之興嗟誠可悲而可哭夫子曰傷  
人乎不問馬余何眷眷於此哉恐國威之未振驕敵之  
南牧也

些馬賦

有序

元  
楊維禎

楊子至錢清之明年僖乘馬老而不任遣奴錢塘市壯馬奴得賈胡馬濟江中流陰霧四合風浪猝作舟如颺箕奴與馬幾溺幸而濟奴歸語主曰主福得良駿良駿幾累僕意者西域異種神物所忌恐非主廐中物也至則格應於圖誠良駿也在度為駉在歲為駟身如織文蹄如截鐵首仰渴烏耳插卓錫尾如流彗目如方諸主人賞其神駿抖其風塵命奴洗馬西江之濱馬臨流振而嘶嘶而踴已而泳於中流莫知所逝奴告主人主人

踣躅西江上皇皇焉計無得而挽則自咬曰驢官賤役也良駿天骨也駕天骨於賤役之地使屈首喪氣若跛將繫狗宜駿之見水泳而去主者不得有也主人悲不自已迺辭而些之曰

吁嗟駿乎汝其縻沒九淵填於海鱗之空乎抑越景超光以返於房星之宮乎將升崑崙抑負瑞圖化滎河之龍乎其將覲湘纍以從其忠乎毋亦暘車白乘隨革尸之憤忽往忽來於江中乎又辭曰靈竒傲儻生涯流肉

鬣星尾文龍虬協圖持出兮應世求嗟我何幸兮逢沙  
丘逝八極兮隘九州觀閭闔兮歷玉臺以遨遊忽泳水  
兮為龍為龜重瀾馳逐兮奴不善泗鹽車坎壈兮為駿  
愁一躍兮釋累而離尤吁嗟淪淪兮蓄怪幽三角八  
尾兮稀鬣牛頭巖牙嚙口兮嚼海舟嗟爾駿兮紛逢仇  
駿不歸來兮貽我憂超越倒景兮乘雲浮駿子來歸乎  
江險不可以久留

御定歷代賦彙卷一百三十五